

總

811

326

孫靜齋

國學萃編

第十三期



順德溫肅署

國學萃編代派處

上海

神州日報館
南洋官書局

湖北

漢陽上銅廠
廣裕和冶坊

吉林

民政司警政
科錢質臣君

南京

坊口大街億太和布莊
虹橋甘溪沈公館

安徽

西門同康錢
莊孫次青君

蕪湖

大馬路松筠閣
磯窩街同泰莊

嘉興

東門南堰中市吳
大成號吳澄甫君

山東

濟南鐵路
分局余君

日本

大清使館葉金毅君
中央大學曹君

九江

官銀潯號
胡蘊山君

鎮江

太保巷裕興號
成堂 榨油公司王君
魚巷文

吳城

吳城鎮商務分
會潘棟卿君

安慶

榮升街張剛勇
公祠張伯英君

清江

警察三區
秦渭雲君

四川

成都府安定書
局胡石生君

河南

城省雙龍巷劉侯君
懷慶府採辦圖書局

香港

實報館潘
蘭史君

南昌

普智派
報處

蘇州

觀前九華堂 閭門
綠蔭堂 義源齋

廣東

華甯里總彙書畫處
濠畔街大清分銀行秦君

漢口

廣智
書局

揚州

文富堂惜餘春
仙女廟田家古玩店

天津

府署東梁
子亭君

北京

琉璃廠各南紙店
印書館 有正書局

第十三期

國學萃編

沈庚藻署



捐助社費

芳名

以收到先後為序凡允助而未交款者概不刊登
照章助十元送閱三年助三十元以上永遠送閱

王琴夢女士助洋拾元

吳伯琴先生助洋拾元

著滯吟社第四十一課題

不用本社課卷
雖佳作不送評

意尹值課

詩題 題太康張氏世忠錄

詩詞均可不拘體韻卷交北京南橫街東頭路南祥符會館內閣金實齋

收限六月底截卷外埠展限十天

張維世河南陳州府太康人明右僉都御史闖寇陷太康死之妻常氏子
正誼闔門自焚正誼妾汪氏亦投井死兄弟子姪二十餘人均巷戰遇害
其弟鑠監察御史甲申之變力圖恢復明亡歸隱與孫徵君李二曲書問
講授以終後以輿論同建專祠經兵燹中廢近李京卿 擢英 疏請仍列祀
典得 旨俞允其七世孫祥麟官上海守備死髮逆難蒙 卹六世孫



庚辰凌烟以辦團勦匪死均附祠焉世忠錄則詳載其事實云

祥符後學金葆楨附識

詩鐘題 中 伏 鶴膝格 嵌第五字 交卷處同上

作至七八卷亦須一一填寫別號否則自誤近數課往往有將詩鐘卷夾入詩卷但於詩卷注別號詩鐘卷即不復注字不知本社將卷送評時係分別包封其時匆促未暇查閱詩鐘原卷曾否注明別號及至評定揭曉每因卷上無名不能填寫甲乙不得已抽去易以他卷此皆作者省筆自誤也特此奉陳尙望注意

本社附啓

加課詩鐘題 凡加課亦須用本社課卷

二出山樵加課

海 軍 蜂腰格嵌第四字 限本月底交卷交至萃編發行所吳君夢蘭代收

京外閱萃編諸君鑒

本社每半年結數一次今已屆期允助款請早日賜下爲荷

諸君或欠閱費或本社謹白

其爲學不談性理而務倫常日用之實教諸子六經而外首重經世之書辭章帖括頗不足之晚年漸喜游心禪恍不問家人事諸孫舜年彭年堯年在籍讀書得天胥穎成丁未冠並能以經義詩賦受守令學使者知弁冕曹侶蜚聲庠校有奇童國士之目封公聞之掀髯笑曰有是哉兒曹教子以辭章昇平科第固甚宜之苟兼植行楊億亦不失忠清鯁亮之士也年踰七旬猶歲一省墓江甯千里舟車不爲瘁四時祭祀必衣冠跪拜詔羹定色愉愉如童孺之在懷抱光緒壬午慶八秩甬守署撫藩以下奉觴祝嘏兩省畢至萬口沸羨榮寵而封公方且感念劬勞背人涕泗蓋至性之秉於天者耄而彌篤如此推而至於早年之色養更可知已宗氏先世爲蜀人明季蜀亂諱凌霄者巡按蘇松遂家南都爲上元人如于世至諱某者爲封公之曾祖 詔誥贈通奉大夫諱炳堂者爲祖 誥贈通奉大夫諱潤者爲父 贈夫人氏某則封公之母也配劉氏 誥贈夫人有淑德懿行顛沛中襄封公以成孝

先封公二十五年卒生五子長得仁補用同知直隸州 賞戴花翎歷署安徽靈璧歙知縣補渦陽知縣次得義三源瀚三品銜 賞戴花翎卽補道歷任浙江衢州湖州嚴州嘉興甯波知府四得智五得福四品銜浙江候補知縣歷任大嵩東江仁和橫浦錢清場監大使仁義智並先卒孫男三彭年江甯府學生舜年堯年上元縣學生孫女如干人封公享年八十有三某年某月日葬於常熟西郊中山街史家路下銘曰

房杜姚宋傳無可紀之功焉貞觀開元之盛相業所宗焉孝弟仁恕言之甚庸焉積善之徵餘慶無窮焉惟公潛德食報之所宜隆焉

欽差大臣西安將軍多忠勇公安慶祠碑 代皖沈公作 陳澹然

文宗顯皇帝臨御三年粵賊犯京畿故西安將軍忠勇公多隆阿始以參領起黑龍江從僧親王討賊 王師既定河南而粵賊猶據江南僞都擾安徽江西湖北僞英王陳玉成獨踞安慶為屏蔽五年 詔北軍南討公通籌將

軍都與阿勦蕪黃馳宿太破賊數十萬遂東壁安慶城下垂克而湘軍敗沒廬州舒桐潛太復陷迺退駐宿松大破追賊十數萬東南全局始振八年 詔統都與阿軍勦皖當是時鄂撫胡林翼方銳意經營天下會湘軍帥曾國藩逼太湖規安慶玉成恐大舉西犯胡公獨表公節度諸軍血戰兩月拔太湖潛山進討桐城斷賊援湘軍遂圍安慶玉成忿大起百萬分陷英霍蕪黃廣宿自統賊衆圍公軍及胡公援安慶公獨出奇計敗之十一年湘軍遂克安慶公乘勝下宿黃廣濟克桐舒廬江拔廬州玉成北竄授首蓋至是公已奉 詔襄楚督軍事拜荊州將軍矣公沈毅堅重不知書用兵嚴靜如山變化如鬼神動輒合古方畧在軍十年絕家報子寄食它所家報至輒燬棄楚督致金三千卹其家乃取襲戰袍賜將士故所部犯秋毫輒斬獨樂為盡死嘗苦戰過桐父老進供張獨臥古樹下達旦父老至今過之有流涕者玉成既死江南賊孤立則大懼而淮上捻益患公北討旬粵賊寇西安衆二十萬

陝西大震 毅皇帝新卽位特詔公入關曾公既督兩江欲倚公東下公念胡公沒益落落寡合遂鼓行而西道破賊商南武關擒還竄遂返南陽討樊鄧逆回之叛關中 特拜公欽差大臣督陝西軍事拜西安將軍遂入潼關解同州圍力疾大戰高陵涇陽旬日橫尸二百里別遣將援隴解鳳翔圍關中大定當是時公威名震天下三年春方仗節討隴而川賊蓋大順竄盤屋廷臣不識公方畧責戰亟公憤起望樓躬桴鼓督戰左目中礮丸鼓音不絕卒擒大順殲其黨而公竟以是薨於軍公討賊十年歷戰三百克城砦二百有奇苦操奇略實爲中興名將第一既歿西北回大熾而東南賊自公去久迺大定故江淮間益悲公不置迺爲辭摭其悲辭曰於赫 王師輟舉東海室韋來王天螯震采石章廣莫山川鬱蒼鬱爲士氣載騰載驤篤生將軍振古瑰傑丹黏天日維峻維嶽飲馬黃河冊勳三輔鞭笞鄂皖益恢厥武指揮談笑砥柱江淮九天九淵鬼神與偕強寇百萬震騰帥府匹馬一呼鉅懸

授虜江淮旣剝僞都孤注宰相建旄天墮飛渡 皇帝曰咨秦關巖險汝往眠師佐予九伐載旆西討狂獠夥隕運此節戲靡險弗摧砥奠關中 皇威斯邇思盪隴表濯腥毳帳何圖駭兇忤我巖疆偉哉長城遽墮咸陽羣帥恣睢餐金肆蝶猗維將軍誓天釀血忠武桑田高風曠軼悲哉將軍迺無家室天縱忠誼不假詩書有國無身曰君子儒於乎將軍浩氣亘古曠百千年英風疇伍亞夫神畧武穆奇烈詔諸太常萬禩斯決鄂羅肆虐輔車嬰患留我混同噫我長山東望咨嗟疇伸 天討烏乎將軍毋志豐鎬特此浩氣披髮太荒殲厥醜虜以靖我 皇濤霍蕘蕘江淮泚泚墮淚鑿碑終古永傷

處士蘇君墓誌銘

仁和 邵懿辰 位西

君諱塋字贊兩先世明洪武中自鄱陽徙居桐城之金神墩桐多巨室而蘇氏代有文學質行鄉人式焉雖無仕於朝族望常與公卿家相踰曾祖懷玉祖芹考正芬君少失父母長又喪其祖遂棄書行賈往來吳楚聞守義介如

錙銖不苟求取以是不得贏然好施與常典質以贖所親之急者祖墓在查林距其家六十里道隔重湖水涸時人行湖中嘗發春省墓跋涉淖閉臚趾徧裂血淋漓改建宗祠督役劬甚至廢寢與食要束族衆無不畏服者其卒也奔哭皆失聲卒後八年鄉人傳君行義列入縣志余嘗觀古名臣大儒之興其先必有密勿之行爲之基兆而所遭際往往出於艱難窘隘迨其末流亦無所藉以爲不善抑陰謀之家類不能昌其後而不忍以私利自予者其心澹白可與天地對夫然故福及子孫而有餘君蓋年五十一始有子曰惇元訓課其嚴未嘗以晚出故少優假之惇元既壯則讀灑洛之書而慨然棄科舉於今有年矣將求所以大崇其親者然則君先澤之所傳其不自是益遠邪君卒於嘉慶己卯十二月十五日享年六十九孺人同邑徐氏 贈奉直大夫之柱之女偕處貧無怨益勵以勸君性嚴栗小不逮輒用譙讓而孺人曲下之母太夫人老年依其子杭州官舍以歿孺人雖已篤老哀號如

孺子每篝燈縫紉課兒讀諸女紡績雞鳴而息且卽起如是以爲常道光壬辰四月二十八日卒年七十四子二人殤一人其一卽惇元女六人殤三人餘皆適士族孫二人求莊求敬惇元將以丙申年九月十四日葬君於查林黃公山龍頭石先兆之次奉孺人附先期請銘余辱與惇元交善乃據所述爲序次其畧而銘之銘曰

處約而安全其天得子而艱象其賢再室不通貽令名以無窮

吳子樸墓誌銘

子樸諱嘉材南豐吳氏吳氏多才子樸從昆弟十人皆賢俊余識子樸從其從兄子序旣又識子序之弟子猶子樸之兄子範子序官翰林居京師子樸之親爲涿州知州密邇京師時往來自子序以通經學古倡其羣弟精治易及禮服務爲深湛之思擇擢奧秘每羣從沓坐辨難盡出余聞詣聞之未嘗不歎吳氏昆弟相師友聚處論說之爲樂也子序言學主陸子靜王伯安求

明於心而子樸自弱齡喪母毀甚瘍生於肘貞疾垂十年瞑眩中取閱佛老子書以自廣因以究子靜伯安之說故其說尤要眇精至雖子序不逮數與余論辨往復未嘗不歎子樸求道之疾敏而立志之堅決也子樸日必合目危坐一時許以攝存其心右肱幾廢然左手書爲小字絕端好以親命應京兆試提筐三入而出無倦亂之色癸卯秋灤州楊生同號舍言其鄉草澤醫人屬召之歲餘不至意且忘之矣甲辰十月子樸以事如京師而醫適至挾還涿俾注藥患處血涌溢不止以卒年二十八妻包氏無子始子樸持陸王之說子範顧不然之獨好陸清獻公書用相觥以語子猷契合故子樸喜共子猷論說而子範常落然其家庭論學不苟同如此子樸喪厝僧舍中反葬未有期而子範來告余余豫志之乃爲志曰

嗟子樸命之促屢楚毒又無續如是所遭豈非酷然資嚮學乃天篤高朗其不愈躑躅心精騰升釋孽縛魂無不之體藏隲

有含碧以無生泣人於九衢共矢丹而赴節匪云標奇是曰配義以明風槩亦厲國人姑臧不瞞其脂膏中牟不塗其肩膊在險彌亮何困於明夷有美勿居僉迷於既濟公之義盡於是矣至其入官如閭顧法如弦稅政無寬窳心自術廣脩士之養或捐廉泉閔宵人之離爰刊嘉石察於湫淑則狐火撲其燎原辯若窮騎則蠻風絕其突戶夷姤之懷無迎距而慷慨之趨可方圓則倜然有古之風飈者也公履絢觀才自疏禹貢衍觚殆聖亦駕疇人表九能而說山川法兩戒而差宿象察於地脈麗以民防溝洫之爲庸馮蠡其必切龍淵怒於帝陸沈幾以填身天池主於暈陰行竟而嬰疾隄防水利厥功足多今上六年楊勇愨公應命舉才賢表公治行首被明詔似鍾君之察人言求令聞遲任城之握手已歎明靈雖四門之聰未膺而三沐之身獨重南州人士何止百里之才建康廉吏不曰列城之表凡以植節於弱冠勸民於耄齡國有賢勞家有則效蓋息彼元室無悶於歸藏而振自單門尤貞其特

獨者矣唐陶從安定書生之後幽墨延年聞杜陵男子之風旁皇厲魄潢池
之亂無象楚國之烈畢張公獨遠迹南都雅遊西伯甚孤於世自勝爲雄揆
名五百歲未竟前光拜表十三行不諧旁視患難之身欲息功名之物何艱
嗟乎不概於懷者窮一流之期不獲於命者大五世之繼家世淵源之歎艱
難德業之遺佚我者何名憂生者實大言求人物彌度初辰道有伏而始尊
人有儀其必顧襄陽之宦遺愛自古吾宗之彥景行在今畢萬之宗必大實
有兆於耆年晏嬰之族多賢不錮然於明問余之志也亦公之令望終亦不
忘者夫

貞媛墓誌銘

史念祖

自來奇女不偶鈍奴具隻眼而紅玉識韓拚粉身而綠珠殉石雖天操圓缺
蔗苦萬殊而人定從違飴甘百折何其烈哉然歷數風流遺恨不盡由月老
喪心使天下父母之心體上古婚姻之意重才輕貨能料平不終貧訪族問

名能却齊大非偶則沒字碑斷不夢迴文之錦收豬奴甯敢望彩鳳之隨乎
家世欺人年華誤我所以尙門第豔稱於王謝強委禽見惡於春秋也貞媛
者夙慧穿珠名儒種玉生小相識童孀無猜罷繡喜而投桃奪篋嘖而擲果
玉妒失白更性潔青女之霜花羞遜紅偏扇掩素娥之月共硯戲調紅粉侯
芭問字餘閒繞牀同弄青梅李白長干樂府垂髫詠絮已知避鶴膝之嫌弱
腕攤牋頗自怯鼠鬚之硬無何紅羊釀劫青虎逢年桃源都是避秦相逢萍
水茅屋無煩窺宋偕住蓬山當是時烽火遙驚絃歌未綴風牽絳帳香遞芸
窗公羊本有專師雌鳳何須割席非張禹後堂作樂奚避彭宣幸伏生有女
傳經獨爲鼃錯豈僅避雨識面疑我是安東貴人直同指月捫心望我爲紅
綃知已贈香示異解佩憐才入門迴盼崔郎奉帷低呼小宋從此畫眉筆禿
願天下鳥盡雙飛擘手得環疑自古璧無不合者矣未幾一繩果赤五絲得
紅鳳簪雖未諧秦雀屏居然射寶蓋郭瑀方求佳婿舍延明而一席空懸苟

卿無限門人識李斯而三公必貴而詎知英才天嫉花貌人尤鳩鳥求賊恨
 煞音如百舌烏鴉占鳳自忘頭已二毛此君凡三娶年已三十餘黑心續黃面之婆田舍
 奴得此過矣紅袖是青燈之伴守財虜安用此哉魂斷虎媒眼枯鸞信蓋李
 益斷絃三娶都憑十萬通神而長卿賣賦千金到此一錢不值矣於是花常
 帶淚竹已成胸計定強歡言酸頻咽怕舉步便成轉念盼後會皆屬庸材願
 弗洩而勿驚但毋忘而莫痛與其押衙徒死頭顱換出無雙何如柳氏舍生
 血性不煩許俊乎與其浴斛覆牀藏刀縫袴何如不許蕭郎識面不令許郎
 牽裾乎與其祖姑投環橫慘重龍生之痛何如雲華祈死膏盲辭鵲綏之醫
 乎母兮母兮惜錯認封侯之婿郎出郎出無與爭泉下之人嗟乎片語三生
 百年一握濃情倍昔絲迸斷而迴纏病態餘妍花將零而慘媚王登卿盟神
 之死正逼良辰戈小娥薄命之軀可憐處子聘幣才通婚姻迫眉求之太促實有以激成之也曾記
 姊為梳髮私比齊眉郎替簪花戲吟攀柳工愁必病憂蠻腰太弱隨風苦讀

忘寒見曠鼻絕憐孤露紅顏知我白首靡他共嚼涸鮓無河傷春非池中之
 物已見乘龍有影誰知成鏡裏之緣嗚呼不屑離魂本期同夢縹緲幾為博
 士才如璞而內含受論語於大家情似絲而不染遇人俗骨惱我童心空薰
 銅臭之身一地吝於埋玉此君腴田萬畝聞變吝不聞喪既乏銀光之面二人徒哭斷金無
 怪嫁女侯高不與凡子議婚溫嶠不嫌自媒而後信天壤王郎真有人間怨
 偶也從此遺珠有恨完璧無慚明知裙不留仙猶望驂能入夢此日竟愧天
 獨活聊血書妃儷千言他年各墮地重生願手見鴛鴦二字銘曰
 三刀挂樹砥石無垠仙山不見鳳鳥銜巾非雲非雨一段良因豈有謬言峨
 冠忽傾一夕怛化翦韭連根壬水不浮三十一人一旦知止占二八春如此
 而已口不忍云

世父陸豐君姬人陳氏墓誌銘

程士經

六如芳偁東坡侍妾之碑九辨靈文北渚夫人之廟貞珉式播瓊彩不滄况

復情懸出於素家縝婉協於中饋桃夭十九擷蕢實於萸篋桂魄一九妒
圖之胸鏡郭公葬妾勒館陶之銘元相悼亡作仙嬪之志如我世父陸豐君
姬人陳氏可得稱焉姬名菊娟小字淡如揚州寶應人也玉痕點頰產冠瓊
花珠慧能擎家鄰選巷七歲喪父隨母育於湘陰李氏畫幃靡風波之定鞅
隨傷背面之緣黃竹裁箱青琴叶軫年十有六言筮吾宗錦馬豔馱則華燭
耀路明珠初繫則銀漢當簾仙裙百褶爭鬪紅妝寶扇半窺障來絳樹或隨
車京雒映綠酒於山眉或約幃津門按紅腔於粉指五湖游倦九日歸來教
事女君勉勳內職世父一官隨牒百粵移家奉匱沃澣獨伺凌晨展簾徘徊
不常夕當彌復稟質柔賦發言安詳委曲多思動容有節勞之而粉脫之儀
益靚怒之而笑頰之度無愆室領二姬陔環羣從言笑晏晏不聞謠詠之聲
提攜惜惜時見嬋媧之影或嬌寵弄琉璃之筆或玲瓏歌金縷之詞池顧影
而鱗驚檻迴眸而燕笑瑣窗晴日奩衣題芍藥之銘繡閣初燈裙刺鴛鴦

之字中閨樂事妙云艾矣世父仕學迍邐中年哀樂嶺南玉局久磨磨蝎之
嗟直北金湯遽撼斷鼉之軸殷憂家國銜恤期功姬則勸食方哺籠衣炙曉
雙波注感雪藕祛煩十索吟歡背燈搜篋陋宦鄉之寶玉儷女重之疏裳載
筮同心咸廣實命懿夫金張之貴猗頓之豪洵洵隆隆曷足踰此宜其婉好
永茂苕華孰意蠱筮心酸龍飛骨瘦寺門貝葉徒留寫願之經屋裏桐棺頓
起嵯峨之慟宜男靡兆簪珥先埋某月日卒於廣州旅舍春秋二十有二嗚
呼豈惟塵世蘭菊同嗟未信仙家鈿釵能合斜日短短愁雲離離鶴飛吳市
之松鳳咽秦臺之竹紅蕪夢斷曾歌去國之詞青草叢生已作薶香之徑開
府傷心之賦笛裏龍悲黃門哀逝之文琴邊鶴怨世父情切虞哀悲工李賦
連環在抱轡轡引腸畫屏啓而魂來枕函捐而夢墮誓夫容而作碣瘞嬰武
以名郊攜壘歸來瓊魂不閔以某年月日葬於某鄉某原土經叨譽竹林授
芬彤管勒銘幽篋代誌哀忱庶幾青蟬霜蛻咸悲齊女之墳紫玉煙還永認

韓陵之石銘曰

生邦溝兮碎嶺外
賸篁墩兮甫六載
敬女君兮佐中饋
才有豐兮福不逮
靈幽宮兮闕瑤采
松篁吟兮猿鶴拜
我銘考之其有賴
隧雲颯颯停車蓋

天贍閣金石記

山陰胡杰撰

嶮嶮太華偉哉仙掌之文落落高風翹矣延陵之碣立乎千載後而欲斟斟
墳索黼藻羲軒年湮代遠復乎難已矧其斗科姬泐竹帛秦灰元凱旌勛抱
滄桑之感昌黎撰頌滋陵谷之悲岷山之淚滴已枯汾水之手痕半滅懷古
結轡覽者弗怡然而訪殘碑於太學尙獲我心覓片石於韓陵差堪共語漫
來雞汁費真手之摩挲揚書鵝黃恍前塵之被濯雖幽光白日曾憾遺文而
碧落書門猶傳篆刻僕夙耽揚子之奇雅抱中郎之癖癖食千而不厭其多
碑獲一卽相視爲寶每慨吉金零落樂石銷磨或兵燹疊遭摧殘真迹或水
王醫厄久闕靈光幾疑鬻等焦桐感深埋棘獨此千年雲護不隨沈壑之波

衡山李孝筮刺史登雲自號四峯山人著有草堂遊壯劍津北征西湖東甌

諸集總名曰萬山草堂詩有少陵詩史之風辛卯歲暮雜感七律十六首傳

誦都門如詠俄太子來遊云丁零絕域育黽黽侍子來王慎羽儀回紇紫駟

方效順尉佗黃屋敢娛娛甘泉未冠呼韓席東海猶聞力士椎落日三邊重

回首由來五餌是厄辭此係家幕雜感第四首又詠蘇皖鄂各省焚教堂事云謔禧烈

火焚沃廟江上遺黎義憤伸要使犬羊馴異類更防鯨鱷育通津 聖朝宏

幃天無外大海狂瀾障有人爲報象胥兼鳥使好憑恭順答 皇仁此係第五首

案此詩議論稍近偏激而筆意雄健又詠翁協揆保薦阮文達之孫 特旨以知縣用云司成

典樂育菁莪胄臨雍盛頌歌博士受書繩祖武文貞遺笏蔭孫柯誦經槐

市鴻儒出聽講橋門雅俗和尋斧鄧林搜杞梓孰令蘿薜老巖阿此係第十首以

上諸詩不特詞意典雅卽事實亦足資攷證江河不廢可斷言也孝筮既以

萬山草堂詩寄示後復貽函商推謂宜刪除詩史一斑錄及所見詩諸名直

稱爲道咸同光四朝詩選以爲元詩選明詩綜之嗣音又函示近作數首均錄於後

師鄭先生大人壇席敬啓者前呈拙集猥荷褒題辱駑駘於駮駢之場廁賦
硤於連城之域奉章竦踊既感且慙伏念登雲生秉庸散之資素渺鄉曲之
譽戊己之間微倖通籍頗思用世自墮風塵遂同蓬梗於是積其牢落抑鬱
之衷舉其塊壘翫髒之氣而一洩之於詩江潭憔悴同屈子之行吟月夜推
敲似孟生之偃蹇顧念天地蛙黽干戈龍蛇正聲微茫雅道乖喪不有哲匠
孰砥狂瀾先生命世大才靈山正覺餐銅盤之慧露掇錦囊之逸藻金臺玉
尺輝映一時至盛至盛然竊有獻疑者自唐元結篋中集段柯古溫飛卿諸
人漢上題襟逮於陳其年今詩篋衍集王蘭麓湖海詩傳類皆朋友嚶鳴之
感前後死喪之間以詩存其人也吳孟舉宋詩鈔顧秀野元詩選朱竹垞明
詩綜沈確士張二銘等五詩別裁類皆備一朝之文獻副千秋之史乘以詩

存其世也今先生踞梁昭明文選之樓建元遺山野史之亭風雲元感金石
召和入編者既五六百家兼論人論世二義而屢紆其名曰詩史曰所見詩
曰一斑錄則何如大書特書道咸同光四朝詩選之爲得耶在先生盛德謙
冲雅懷損挹避聲聞之果不居利成之功究之赤城建標滄海虛受名者實
之賓實至有不名歸耶夫鸞鳳翱翔黃曆之上而鸚雀不離樊籬應龍騰躍
太清之表而漏鯨常困尺澤登雲早歲以鄭荔鄉先生國朝名家詩鈔小傳
無單行本曾鏤版藏並擬紹續牽羈世網玩揭居諸忽焉老矣有志未逮今
覩先生採集之盛不禁汗涔涔下昔人有嗜芹獻曝之文愚者有千慮一得
之致敢冒貢其慊悽並錄上新詩數首惟先生簡正是荷敬請纂安伏希垂
鑒不宣李登雲頓首以上各詩均附此兩同寄故並錄於後師鄭注

題漢陽萬仰山明府宗林藏葉小園道畫雪中雀竹

霰雪紛漠漠風雲浩茫茫客鳥爾何來此君互低昂我願執此鳥歲寒與偕

臧侗以青琅玕匹以丹鳳凰時哉不可得引領徒彷徨感念山中人掃徑延清光

次韻湘潭趙芷孫侍御啓霖言事去職留別詩二首

綠柳黃槐沸夏蟬阿誰輕策蹇驢前欽鴉鳳鳥原相似魏闕江湖倍惘然失
路太行車軸折乘船滄海碾渦旋不須風漢狂言事周召聯翩夾輔賢
漢宮羣彥集華簪不盡雲房霧殿陰葛石蔓蔓山雨晦楓林湛湛江水深饑
鷹自鍛搏風翻棄馬仍存掣電心生長維才遷謫地柴車歸去漫沾巾

悼某女士次其黃海舟中感懷詩韻

百靈風雨攪溟漠萬古雲煙絢汗青俠骨忽聞掀女界雄心直欲冒天庭于
公雨破三年旱齊國霜飛六月腥莫向吳宮仍教戰春紅夏綠總飄零
陽父三川嗟實震王尼滄海歎橫流廣原無限英雄淚漆室還貽女子羞北
闕上書迴父獄東齋有勇報父仇千秋巾幗尋常事填海移山憾未收

馬太守詞并引

太守名昂霄字雨峯江蘇吳縣人道光乙未恩科舉人大挑知縣升知府攝
杭州府篆未兼旬粵賊自湖州陷省城投井死浙江忠義錄有傳
咸豐庚申歲二月杭州賊自湖州來彗星掃地地欲裂壞雲壓城城忽摧刀
光潰血槍點雨狼藉百里撐遺骸皇皇太守死忠義天陰慘贖井水灌雍門
刎首爭越甲陽瓚抗節存滑臺西晉君家故汧督殺身成仁同茹哀五十年
間事反覆鯨吞鼉吼凌奇裁鬼雄毅魄儻可作乾坤灑氣驅風雷

輪舟卽事

自題漢陽萬仰山明府藏業小園畫雪中
竹雀以下至此凡五題均李大令登雲作

危舸凌風迴飛輪挾水鳴萬流滄海匯一笑大江橫落日悲生事浮雲任世
情高深誰得悟浩蕩此南征
試向金陵望長天澹冶春江山龍虎舊臺榭鳳凰新樵斧穿雲谷漁舟傍水
潛夜來風雨惡黑海正愁人

乾坤此機械晝夜不曾停霧引寒潮白雲垂落日青五洲瞻北極一水接南溟載訪嚴陵釣江山有客星

胡梓方九日登雞鳴寺諸詩 附戊申十月寄余論詩函稿

鉛山胡梓方朝在江南海軍學校畢業英文算學功力甚深近歲遊於陳伯嚴前輩之門學為詩歌寄示近作凡二十餘首筆意清矯不同凡俗如九日偕晦九登雞鳴寺云爭買霜螯古寺行斷垣一角認臺城強開懷抱作重九喜有友生勝弟兄陌上雲黃千柳暗眼前秋水一壺明故鄉亦有登高處白髮年年識此情又中秋夕寄內云年年此夕臥江頭今日來吟白下秋衰柳亂搖毛髮冷故鄉權作夢魂遊湖山又是佳時節兒女何曾解客愁颯颯西風一夜雨寒衣閨裏寄將不又上梁節庵先生即用其哭王鎮江韻云海內文章幾輩存播糠眯日日為昏南國佳人自幽絕西江落月相吐吞尊前苦憶武昌鱸嶺上重聞清夜猿回首江湖一惆悵九天銀漢隔雲根

不意清門遭變天降凶閔司馬夫人倏焉驟驚奪此良配使公白頭不諧哀痛摧剝楚毒奈何伏惟達人觀彭殤一致上謝莊叟猖狂之歌下免荀生惑溺之詠毋曰情之所鍾正在我輩邪損惠教札良荷記存秋懷十二篇篇篇元勝枕上讀之如松風瀑布不覺去疾孔璋之檄頭風下牀子美之詩瘞鬼退舍以今觀之非欺我矣郎君落落快士當是千載人雲柯扶疏雖有節日無傷珍幹非楮栲園物也王謝子弟何必盡皆青紫要須有門風耳大器晚成不在早就良材求用於十年之後良馬求用於十年之前智者不背時以毀節豪士不違機以徇名朝榮雖好豈易彼夕秀哉不肖惡疾纏綿髮枯齒凋寶刀無色壯志盡落復何意人間事邪喪妻五載房帷尙空生有兩男子大者木魯可使荷耨種豆南山小者七齡稍有頭角且能強記數行若芝草無根則此子或堪寄以門戶然恐暗嶼無松柏也霜降日短海國多寒高枕加餐用慰衆望

情之所鍾 王衍喪幼子悲甚山簡弔之曰懷抱中物何至於此答曰至人忘情最下不及情情之所鍾正在我輩耳

榼桷 進學解大木爲梁細木爲桷榼榼梁上柱桷椽也

嵒嶼 小阜也鄭子太叔語

與歐楨伯

足下握蘭南省秣陵詞客無不願爲執鞭也者僕不能買秋風歎段一觀北海賓僚之盛則豈勝搔首乎自江都別後幾十寒暑足下五斗長安僕一頃南山豆耳種豈燃其與佩刀騎馬誠貴賤殊等然雄飛雌伏各自適也負耒沙中不幸無歲徒藉捃拾自給安在明所踰二旬屈指舊游未嘗不稱歐光生空望澄江練如安能褰裳濡足耶會在明之猶子沿牒入都方有事於司空省中題一詩扇頭奉寄因聲致君家李記室久不覩其一斑遂當十倍方回耳

握蘭 謂尙書郎

秋風歎段 馬也

搔首 謝靈運詩搔首訪行人引領冀良覲

一頃南山 楊惲免官家居作歌曰田彼南山蕪穢不治種豆一頃落而爲萁

方回 賀方回唐人長爲長短句

與傅明府伯俊

拮据沙上捃拾洪濤之餘僅得脫粟百斛安能不歎侏儒飽死邪米艘須窮督之不然以雀鼠耗者半矣傷哉貧也而學田舍翁使君當蟲沙我耳孫生幸脫虎口我諸舅含笑九原能無結草爲報青浦公以使君不許其請意不能無望焉何不借之而西大不落寔客島中成一詩以代攀轅遣力先投記曹月生潮上始獲渡江當於昆陵待前旌矣家弟乍辭漁獵恐不堪贊使君

畫諾則望假其羽毛

拮据 手口共作者也

田舍翁 宋武帝奢欲無度袁顛盛稱高祖儉德帝曰田舍翁得此已為

過矣

蟲沙 穆王南征君子化為猿鶴小人化為蟲沙

假其羽毛 西京賦所好生羽毛所惡成瘡瘡言好者譽之而使生羽毛

惡之而使成瘡疾也

畫諾 漢宗資為守委任功曹范滂故謠云南陽宗資主畫諾

與胡江陰

江干蕭寂披讀使君函中五色書不勝照臨我哉而又僅嘉惠安能不汗浹背也沙中污邪才半洛陽負郭乃為海若所侵躬身刈穫不踰斗筲恨不為精衛以函谷一丸填此衣帶耳後車不著王生而與文叔偕漢帝安得聞長

者之言哉一詩題扇頭聊助解頤

沙中污 謂田地之下等地也

洛陽負郭 蘇秦為從約長歎曰使我有洛陽負郭田二頃安能佩六國

相印

精衛 赤帝女游東海溺死神化為精衛鳥常取西山木石以填東海

與郁文叔

胡令君後車不載王生而載足下我不勝妒甚雖然王生無他奇不堪裨渤海如故王生也匍匐拮据以事沙中阡陌乃其所入不盈五秉何若立談賜璧作諸侯說客乎然恐說難如韓非耳東方生餒欲死足下何以策之安得驅雞入白雲也初六日渡江與足下別且欲謁令君令君門者如鬼乎請足下為樊舞陽

驅雞入白雲 言仙去也劉安故事

樊舞陽 樊噲封舞陽侯此云門者難見欲其如噲排撻直入鴻門爲沛公羽翼也

寄馮爾之

青浦君言得足下書奉檄而喜大異掩關面壁時賢者不可測哉馮家郎安得作腐鼠態今歲以波臣不靖侵我上田錢縛畚鍤而過在明家苴塞罅漏拮据力作僅獲遺穉二三十鍾皆取諸魚龍滲漚之餘未足餬口方是時使馮先生而客我從者幾菜色矣青浦江陰及我敝邑府君並以入計至闕下月飲亡何不知損馮先生濁醪幾十石異時太史妄自尊而傲諸侯大夫司馬子長對中牟漁陽想不作此俗狀公見二三君將云何請以曝直之暇持一胡牀夜出長安馳道單絞庫幘起舞行酒月下鳳凰樓宮漏丁丁二十刻猶恐不得諸君耳熱也

遺穉 脫禾也

中牟 魯恭爲中牟令有異政

漁陽 張堪拜漁陽守勸民耕種

曝直 謂京官連入直也

胡牀 庾亮在武昌諸佐吏乘秋夜登南樓飲不覺亮至亮曰老子於此興復不淺便據胡牀而與談詠

單絞庫幘 謂便服幘巾

謀野集刪卷二終

段八年獵檢犯塞大駭涇陽公摧鋒轉鬪羣凶折首給封四百戶授營國公
貞觀六年破陵州獠授左驍衛將軍坐公事削此貞觀六年以前與之事蹟
史皆略之惟云平京城累除左監門將軍從太宗破薛舉平王世充竇建德
累封營國公賜物二千段金三十錠尋坐事削爵碑以削爵在授左驍衛將
軍之後史則先坐事削爵而後授左驍衛皆當以碑爲正史又云從特進李
靖擊吐谷渾爲赤水道行軍總管坐遲留不赴士卒多死亡甲仗以勳減
死此則碑所不著碑又云十一年還除左監門將軍十五年扈從巡方檢校
左驍衛大將軍領千騎十八年授雲麾將軍守左監門大將軍封襄城郡開
國公食邑二千戶蓋營國之封前已削至是復封襄城史惟稱久之累拜左
監門大將軍封襄城郡公碑又云十九年變輿東指龔行遼隧定州還朝副
梁國公宮城留守賜物三百段檢校右武侯大將軍史亦稱太宗征遼副房
元齡留守京師俄又檢校右武侯大將軍碑又云廿二年從幸玉華宮因留

守廿三年除左監門大將軍則史所不書碑又云永徽元年四月卒贈左武衛大將軍洪州都督江饒吉處鄂處撫八州諸軍事使持節洪州刺史陪葬獻陵諡曰思公史稱贈左武侯大將軍不書諡亦當以碑爲正長子護軍漢王府兵曹參軍修義世子上騎都尉荆王府法曹參軍修武史亦無名蓋五代亂離此等碑版亦復缺失景文存舊史之文不復訂正藉非貞石尙存不幾湮沒哉

岑文本造象跋

象刻岑文本敬造西塔一佛二菩薩岑嗣宗誠造東塔一佛二菩薩嗣宗之名不見於史宰相世系表亦無之意當爲文本兄弟豈卽表之文昭耶按法苑珠林唐中書令岑文本少信佛常念誦法華經普門品又云文本就齋於自食椀中得舍利二枚是文本之造佛像宜可信也

大唐蜀王故西閣祭酒蕭公墓志跋

碑云公諱勝字元寂梁中宗宣皇帝之孫太尉安平王周柱國巖之第十三子也按周書蕭管傳巖字義遠管第五子歷侍中荊州刺史尙書令太尉太傅入陳授平東將軍東揚州刺史陳亡百姓推巖爲主爲總管宇文述所破死隋文本紀開皇元年五月丁未梁主使其太宰蕭巖來賀七年八月庚申梁主蕭琮來朝九月乙酉梁安平王蕭巖掠於其國以奔陳外戚傳琮來朝遣武鄉公崔弘度將兵戍之軍至都州琮叔父巖及弟琳等懼弘度掩襲遂引陳人至城下虜居民而叛所歷官太尉安平王均與史合惟周柱國不見于史碑又云爰自綺年已膺茅社封爲宜陽侯勝之名不見於周隋諸史宜陽之封猶是後梁時也故其下云俄而青蓋云歸云云碑又云隨授散騎郎皇朝爲上上輕車都尉蜀王西閣祭酒按諸史高祖兄次日湛武德初追封蜀王職官志王府官屬有東西閣祭酒各一人從七品上史謂湛封蜀王爲追封則湛當歿於唐氏建國之先不應建置官屬恐武德初湛猶未歿然本

紀高祖受禪卽封湛子博又爲隴西王則湛已前歿可知宰相世系表齊梁房巖安平王下缺四世據碑足以補之

唐太子左衛杜長史妻薛氏墓誌銘跋

碑云曾祖胄大理卿刑部尙書內陽文公祖獻工部侍郎泉資定隴四州刺史贈洪州都督內陽穆公父元嘏通事舍人朝散大夫行益州晉源令按胄周書隋書俱有傳碑所書則隋官也其封內陽諡文史不書隋書傳云子筠獻俱知名唐書宰相世系表薛氏西祖房胄隋刑部尙書獻工部侍郎內陽公元嘏不著爵位然則胄之封諡獻之爲刺史贈都督諡穆元嘏之官位皆可補史之缺又隋書云胄二子筠獻今表列獻而無筠益徵世系表之不足據

唐越州都督于德芳碑跋

碑前數行殘泐所書官位云開國男云大中大夫云都督原慶四州軍事云

顯慶三年授金紫光祿大夫使持節隴州諸軍事隴州刺史按唐書宰相世系表後周司空燕文公實孫隨驃騎大將軍黔昌定公象賢子德方越州刺史黔昌男與此碑合云龍朔二年二月乙酉朔其年五月癸丑朔皆與通鑑目錄合嗣子前荊州大都督府錄事參軍代州司馬護軍昶可補世系表之闕

都督姚意妻造象跋

此碑已殘泐其可讀者有云口州都督長沙公姚意之妻也又云龍朔年中缺居伊闕之別業夫人時入洛路由此地願男女長大於此壁敬造云云按唐書姚崇傳父懿字善懿雋州都督贈幽州大都督諡文獻惟世系表云字善意唐初多以字行與碑合按之史懿諡文獻崇亦諡文獻是父子同諡矣據碑公上缺字當是一字諡而長沙則其爵號皆史所不著碑又云二尙書同臺鳳閣三品上柱國當是述其子元之歷官又云鏡任澤州陵州縣令

同任衛州功曹參軍昇任宋州參缺奕任雍州口陽縣令昇任缺曾孫廣任左口林軍云云當是述諸孫歷官按鏡同皆不見於史昇爲崇弟元素之子後官至楚州刺史昇奕皆崇子昇後官至大理卿奕後官至永陽太守碑爲徐僑之書其年代亦缺

大唐絳州聞喜縣令蘇府君德政碑跋

碑云蘇府君名昱魏都亭侯河東相侍中則之十一代孫按蘇則三國志魏書有傳碑又云缺上大將軍光祿大夫太子少保御史大夫國子祭酒大理卿京兆尹吏部缺部刑部三尚書尚書右僕射開府儀同三司襲邳公又封甯陵侯房公則昱之曾祖蘇武也碑所書歷官皆與史合吏部下缺字當爲民部惟甯陵之封北史作房陵隋書不誤碑又云祖缺隋普王文學太子洗馬鴻臚卿著樂志一部按威子夔字伯尼起家太子舍人以鍾律自命後與鄭譯何妥議樂不合作樂志十五篇以見志仁壽三年詔天下舉達禮樂源

詩羣卷四

番禺沈宗畸太侔輯錄

梁鼎芬

字星海廣東番禺人光緒庚辰進士官湖北按察使司按察使

訪潘孺老雷瓊館有贈

雪殘萬念入支頤羈羽沈鱗共一時瘦固勝肥誰則覺生何如死世還疑棋當危局須心力花到良辰已鬢絲每恨古人吾不見掃除獨見閉門時游龍丈故園追悼遂與表弟鳳鏢別

鹿已添籬竹有孫再經華屋愴生存清光猶見當年月芳意曾題半畝園遺器東廂吾忍覲明珠南越世方喧射雕身手澹沈早不縛天驕大此門蒼莽兵塵一局棋淒涼舊館兩孤兒剖肝自見原非福唾面能乾恐太卑風雨獨存蘭杜性江湖多負鳳鸞期短衣犯雪明朝別不到津橋聽子規

秋懷

羈情了無泊拋去又相尋聞雁知兵氣看花長道心百年紅燭短一水夕陽

深獨有雙龍劍時時壁上吟
洗肝亭雜詩四首

說食與夢飽厥後同一無何以口腹事可縛人閒
徒願拂衣上塵回念心地初

意質非神仙勇退亦可敬誰謂養生言世網不全命
歷塊易一蹶萬里我不慶深深隱淪者天下以爲柄

千齡一日積此日誠艱哉觴急可以緩花落還當開
獨出萬物表心光自然回粲然若有識一點靈犀胎

燒香香已寂意銷吾如何名迹械衆生要與前沈疴
美人牽不得隔此一片波江海日以遠霜露日以多

行舟寄慶筵

昨別百千語初醺三兩杯中流羣所攝大化縱能回
擾擾世間事輕輕塘外

雷夜涼知有雨書館失追陪

龍王廟問朱君一新疾二首

古槐一兩樹鍵戶臥經時秋蝶多垂翅寒蟲不吐絲
藥乾僧代揀衣少僕能知勿以幽憂極遭逢有國醫

陽窮斯悔吝身遠更冥沈山氣銛人骨簾衣限樹陰
芳蘭託容谷落日散疏林相悅寂寥境聞鐘何處音

同孺老北郭游園歸

昔年荒草尙畦畦人漸安閒衆力興已見屋廬還舊日
欲尋花藥共良朋園丁未服生疏鶴春色猶妍老大
藤看畫嘗茶無一事窗簾風細又飄燈

許先生景澄王詠霓繆荃孫樊增祥同登多景樓

昔年一到此壞檻已爲薪漠漠雲中樹厭厭泉下人
幽懷塵作字凍面酒成春不用談興廢閒游孰可頻

燕

春雨已如此營巢猶自前人天通窈窕物我共安便性慧能知候機忘漸入
禪涼秋歸日準送汝忽年年

雲帆方丈出示宗室竹坡侍郎所遺帶時侍郎新逝感悼書此

蘇公留帶偶然耳後者文襄楊公今竹坡事過百年人始貴我無一物意還

多較量興趣難慳句想象神儀各有科心斷蘭叢霜一霎閒堂獨在夜如何

同龍二表弟登北固山

天風吹人危欺我病雙脚空懷秦漢君幸解顛頂瘡昔賢富佳致共子更搜

掠佛座冷苔衣春巖眷蘭薄蔡謨謝安皆雲霄楊岳彭玉亦祠閣峻壁江更

深解維水初落

入廬山

我生久行役入山苦不早身帶靈寶符雞犬自牽抱清風散陰氣日出安用

禱五老如故人依稀夢中道

山行得二絕句

微軀天意早安排豈有彭殤攪我懷劇得茯苓無所用山僧留與餉清齋

砌瓦依山結小亭流泉終古響泠泠強標第六嫌無謂優劣隨人各自聽

竹林寺

日出接清氣竹風微送予青鴛辭世早王半山竹林寺詩白鶴與人疏客病

能危坐僧閒補壞書已知斷常見不限孝然廬

獨遊甘露寺

鐵塔燒殘已不成寒鴉古徑少人行憑高望海天方大傷遠思鄉歲又更壁

上久無靈運畫山前誰見贊皇名講花飄雨僧同盡坐聽風回浪打聲

寄題簡竹居讀書堂

腹中萬卷可支餓世上點塵不到門至念陳樹康祖天下士一嗟無命一分

源

迎陽故作軒窗敞耐冷還依水石巖今日承平無個事乾龍不必問飛潛
 高密通儒經傳熟濂溪老人風月溫諸子紛囂無用處始知南海此堂尊
 多種竹松扶士氣閒論禾稼識農功旁人莫笑先生隱儒者動名本不同
 別來滄海還多夢老去茆庵尚未成絕羨武夷精舍好談經何日罄微誠
 得伯巖書

千年浩不屬君乃沈痛之神思可到處纏繞通其詞窮山何所樂予心忽然
 疑試君置我處魂夢當自知把書闔且開情語生微漪出見東流水湯湯將
 待誰

寄懷香隲

仲車別我一秋餘破帽欣然返故居畫紙老妻教對局扶牀小女學翻書自
 烹寒菜難逢客偶過前村不待驢葦管瓦池貧亦好世間何者可能如

題瞿鹽法廷韶快園圖

舅氏後先登玉堂

謂蘭軒五舅嘗子十六舅也

兄取二士瞿與張

君與幼樵學士同中庚午順天鄉試五舅所薦

簪齋習儒未習戰一旦消搖居洞房君家忠宣我所敬皦皦大節垂吾鄉小
 東皋宅委荒梗遺書經亂復散亡賢孫香緝官舍暇遺烈往往吹園芳園中
 何有有圖史亦有翠柏三兩行廡回楹接最妍穩鶯初雁晚都閉長爭墩君
 笑荆公坳題閣我步涪翁狂紛紛畫史所不到酒酣弄筆驚何郎維高樓花
 氣團尺地落霞江影明千艘平生浩蕩白鷗意不覺魂夢飄湖湘外家松廬
 早太息況有玉樹埋雙雙士信知己無不報成材要到樅枿強秦青已去曲
 不去歸語鄭子談經窗懼齊十六舅所取士今同作十桂堂客
 贈別顧印伯
 相逢未穩復西東草草杯盤酒面紅雨雪梅花正月尾籬牆茶夢一星終良
 才肯信長無謂妙論依然屢不窮此去金臺鶯燕節芳菲零亂句難工

甲午正月二十五日江行

春波綠始柔素雪吹參差相攜有同心泛舟因所奇隨風夜潛移轉屋朝漸垂壯觀江路關心領目已移萬物役於形既往方自知消搖一百里勞者今在斯歡持一觴酒何必歎臨歧

叔嶠季約赴試同行

黃州二首

積雪晴更皓春曉過黃州野梅香不滿隴麥青已抽蘇公神仙人題詩上山樓天地著一我浩蕩輕百憂當時聊且適後世不可求運命亦須順欣慨余何稠

楊生追昔遊偕客衝雨至

去秋八月伯嚴叔嶠靜山穰卿社者來游楊惲無鄰蘇園余以病未至

言訪臨皋亭

遂啟鄰蘇筍沙柳去時枯今見條已膩日月如白駒人生貴適意獨懷雪堂上英光久埋地刷涕望西山撫衷有深志

花朝泛甘棠湖遂登煙水亭

勉憲集敘

儀交四方君子則周子季貺為最先季貺中州名家子有志節能文章定交之始相際莫逆也別六七年儀游閩中季貺來官斯土得昕夕過從盡讀其文辭同聲之應如廢瑟焉儀填詞工不及季貺而先已弃去每誦其勉憲詞婉篤微至如衛洗馬渡江時傾倒一世令人招悵不能自己賢兄叔昫侍御詞名藉甚少作二卷季貺屬儀審定因取勉憲詞並列焉當使四方君子知填詞中有儀塵機雲爾甲子人日譚儀仲儀撰

勉意集目錄

詞一

朝中措

疏影

浣溪紗

柳梢青

淒涼犯

金縷曲

高陽臺

金縷衣

目錄

展鳳閣書甲集

消息

浪淘沙

齊天樂

摸魚子

壺中天

聲聲慢

減字木蘭花

蝶戀花

洞仙歌

喝火令

減蘭

前調

百字令

菩薩蠻

減蘭

漢宮春

念奴嬌

鳳皇臺上憶吹簫

長亭怨慢

卜算子

虞美人

浣溪紗

蝶戀花

虞美人

甘州

琵琶仙

陌上花

勉意集

祥符周星詒

詞一

朝中措

泊三板橋感舊

畫船明月客衣單日暮水生寒白板垂楊門巷紅樓臨水

闌干而今寂寞淡烟疏雨人在天邊正是熟梅時節那

堪重客江南

疏影

題童二樹先生梅花

斜斜整整正曲池雪後閒庭烟冷玉蕊寒香水北籬南橫

枝幾樹關粉當年花底千回醉想舊事花猶能證恨匆匆
似水流年蕩得舊遊如影 忽地披圖憶起歎公孫老去
苔鎖三徑粗服亂頭繁蕊濃枝渾似小園丰韻硯池淡墨
春長好替寫出消魂風景悵花時亭館清寒門掩月黃人
靜

浣溪沙

無題

弱柳籠烟媚嫩晴落紅庭院晝冥冥風前凝立不勝情
飛絮時光新燕語賣花門巷簸錢聲傷春情緒怕黃昏

柳梢青

像亦俄空佛敕不得憑誰力訪舊多爲游岱魂求如汝壽那可得同遊俱是
感慨人藉草相看到睡黑往年妖亂等一夢錦庫成灰銅仙泣遺此區區老
秃樹豈足增壯帝京色雖不中用亦復佳左傳杜註無能爲
役猶言不中用留與後來阮亭
望溪弄筆墨

政務處諸公招同樊樊山簾訪遊積水潭示樊山

東省夔龍坐上齊招涼同到後門西舊人惟有樊山老愁絕僧牕續舊題
對岸喬林付爨煙水西 百株盡爲 寺老樹數
寺僧所伐荷花愈少愈堪憐雖然不是滄桑事
但惜西涯變稻田

和雲門南河泊之作卽同九佳韻

江海無能一病骸獨欣藪澤免塵埋早涼樹鵲聲先喜殘睡漁翁眼乍揩謀
野曾無裨謀獲遊車姑學邵雍乖鑑湖儻荷 君恩賜致仕何妨被硬差

歌曲

念奴歌曲賀琵琶天寶遺民認不差父老若狂知有意自欣凝碧屬唐家

過琉璃廠

畢董殘裝有吉金陳思書肆亦森森曾聞醉漢稱祥瑞何況千秋翰墨林

李文正故宅

獨樂園中花藥荒思賢重上讀書堂誰編元祐初年事且喜諸郎尚有康

國子監拜熙文貞王文敏兩公祠遂觀石鼓

戟門階下綠苔生鳳翥鸞翔老眼明人紀未淪文未喪巋然十鼓兩司成

留滯都下日久時有唱酬

李越縵謝麟伯王霞舉袁漸西宿草萋區區風雅亦陵夷薛能自忖無功業

不恥粗官好說詩

中興一首答樊山

流轉江湖鬢已皤重來闕下撫銅駝故人第宅招魂祭勝地林亭掩淚過

前席頗憐非少壯小忠猶得效蹉跎神靈今有中興主準擬浯溪石再

磨

拜寶竹坡墓二首

翰苑猶傳四諫風 至尊能納相能容楓林留得愁吟老長樂疏星獨聽

鐘

百疏危言日月光差傳子政作金方市樓一瓊良鄉酒那得魚頭共此觴

甚官侍郎時嘗凌晨訪之惟新熟良鄉酒一壘與
余對飲更無鮭菜鹹蠶一碟而已 用魯宗道事

此日足可惜

鶴蓋晨飛到夕曛借廬泥滑更辛勤神州多事光陰少還望陶公惜寸分

風氣士大夫多散處城內外有遠在城東北隅西南隅
者凡入直到署及朋友往還約略日須奔走三四十里

食陶菜

都官留鱸為嘉賓作鱸傳方洗洛塵今日街南詢柳嫂只緣曾識舊京人

香宗伯以西湖五柳居烹魚之法授酒家名曰陶菜今寔失其法矣

九日登天甯寺樓

過關當行復暫留數將新綠到深秋貪看野色時停騎坐盡斜陽尚倚樓霜菊吐香侵歲晚西山滿眼隔前遊廊僧亦有蒼茫感何況當筵盡勝流

白日一首示樊山

又到山寒木瘦時黃雞白日去如馳詩才已為塵勞盡霜鬢空教海內知送遠添愁身是客解憂無效酒盈卮夢中爭苦煩驚醒櫪馬依牆齧斷萁

金陵遊覽詩

余兩假江節不暇遊觀甲辰春奉命來與江督議事公事無多又不能速去日日出遊以謝客

薛廬

在烏龍潭上昔為全椒薛慰農院長所居今為薛祠潭即顏魯公放生池也今有魯公祠

人愛顏魯公池古澤不竭天憐薛夫子分此地幽絕閉山籬門內貯水臥榻側貧士生巧思一壑遂專得吟詩構杜堂問字比揚宅雖無五松雅猶勝倉山熱路荒花竹門家索藩牆缺溪亭徒兀兀無梁不可涉自炷影前香悽然

懷抱別常恐嘯詠事後起遂銷歇

元武湖

滄海日以東江湖日以遠城頭紫氣盡城下白波淺龍子去荒洲春深荻芽短逶迤隨崇塘縱橫抱鼻嘯樂遊與青溪自笑蹄涔編勝國一紙堆今日萬家產賢侯勛業多豈暇計瀦閼闔樂藪澤白舫洗心眼欲使清虛露先將荒穢翦污萊畀農漁蒲荷兼游衍利害隨時生陳迹不相踐葦間貪延綠浦口暗西曠

莫愁湖

蕭衍黠老公豔體託麗人製為莫愁曲歌者頰生津遂令石城水曼膩嬌千春將柳作腰支以山當眉鬢六代迄宏光海枯湖不涸顛倒滿城客髣髴遊洛濱可歎遊觀末亦罕真賞存了無川嶼媚一勺安足珍白雨忽飛灑水草生精神明鏡頓如拭一洗金粉塵

雨花臺泉

不見報恩塔猶見雨花臺信知象教力帝王不能摧灑此一清涼救彼羣昏
霾一嗽肺肝平再嚙神識開此邦苦爨汲流惡孰決排安有脂粉膩時見糞
草偕疹癘固由此坐使風俗卑汲汲安吳翁陳義通江淮符調忍獨清見泥
志勿衰

韋氏愚園

有六朝石宋人題字曰劉季高甫律
綱其旁紹興丙申十月乙亥十六字

甲第什佰區充塞治城中云是大將家一堂役萬工土木朱紫衣歌舞玻璃
鍾佳哉婺源叟獨以園池雄浩渺起鷗鷺心落滄洲空撫此徘徊石頓思相
賞松池東有礪壑畫意參荆種池西多嘉實霜餘綴青紅我來值冷落掃除
驚兒童無人亭黯做不翦花蒙茸獨有賞會處不與衆人同

青溪

劉江諸大宅一礎不可尋遺此衣帶水穠華變清深稍稍種桃柳寡薄無繁

永玉鳧爐可憐簾底窺人銀黃月子也消瘦似伊風韻 赤闌凭瑤箏一十

三絃斷夢替句醒數點殘星飛墮綠楊頂尋常廿四屏山護寒猶怯怎禁得

今宵露冷偷聲木蘭花云揉藍衫子乾紅袂絡繹金泥花璫碎背面妝勻拖

頸香雲一尺春 綠楊紫陌城西路長記當時游冶處門外鈿車莫又雕輪

碾落花滿庭芳云紫陌催歸綠章罷奏匆匆春去人間東風影裏吹損小華

年絕豔終歸坏土者殘紅還有何言便忍與情天終古到死是朱顏 堪憐

誰替汝上排碧落下訴黃泉料香魂十萬難度神仙偏要為花請命恐東皇

無力周旋空留得眉尖心上三字落紅天子夜歌云祝東風萬花吹徧莫長

江南紅豆又勾惹舊愁新恨嬌怯怎生消受束竹腸攢食蓮心苦替得那人

否恐怕綃緘淚天涯點點桃花半斲泥金小袖 總念我燕山倦旅要把歸

期斷守鸚喚簾前馬嘶門外盼到容光瘦待鏡臺雙倚玉顏能幾時候冉冉

青春沈沈紫曲鈿約長孤負為蕭郎擔盡虛名相思還又金縷曲云綠暈螭

險雪試重奉鏡衣一片照人圓缺曾照眉峯翠碧瀟曾照淚冰紅結恨不照
 千年小別聞說擁衾低髻夜賸羅衫瘦裏飛龍骨腸欲斷送春節 畫樓深
 鎖金蟾齧記年時吟聲低和有人點屨重搢玉壺填怨句無復病鴉悽咽只
 窗外籠鸚替說還恐姍姍環珮至為思君唬損黃昏月怕泉下更淒切氏州
 第一云一縷春愁搖漾似絮飛入 平笛孔銀字綠損華年紅銷英氣空把黃
 金鑄淚樂府功名算未必大晟許爾寫出江南嗚嗚兒女為誰如此 縱付
 么娘檀口裏又彈向四條弦子天寶宮人貞元朝士到底何身世怕西風吹
 鬢影能消幾迴腸邊氣只有湘纍舊離騷可憐知己

世傳竹垞風懷二百韻為其姨妹作其實靜志居琴趣一卷皆風懷注脚也
 竹垞年十七娶於馮馮孺人名福貞字海媛少竹垞二歲馮夫人之妹名壽
 常風懷詩所謂巧笑元字靜志兩同心詞所謂洛神賦中央小字只有儂知也少竹垞七歲竹垞生
已而風懷詩云問年愁豕誤故知曩聞外祖周季况先生言十五六年前曾
靜志生崇禎乙亥為少七歲也

見太倉某家藏一簪簪刻壽常二字因悟洞仙歌詞云金簪二寸短留結殷
 勤鑄就偏名有誰認蓋真有本事也太倉揚雲墩叔溫有駕水仙緣傳風懷

詩稿舊藏聊城楊又雲司馬家後歸嘉興沈子培提學稿凡五紙風懷二字
 係後改定其先亦題為靜志也君直有洞歌仙題其後云萬千劫換只情絲
 空裏墮落人間踏還起被金風亭長句上吟箋親印著顛倒鴛鴦鈞記 墜
 歡重拾取便說當初已是相思鑄清淚何況到而今二寸金簪怕蝕損蕭娘
 名字判買箇蜻蜓訪萋湄要替證芳盟仙緣鴛水

陽湖錢夢鯨比部振鐙負氣坎軻不可一世世目之為狂非真知夢鯨者也
 夢鯨人有風骨能以身分為重名位為輕處此類流眼中之人吾見亦罕所
 刻謫星初二三集中說詩筆談雜著諸種持論或未免過高駭人聞聽要其
 浩浩落落自抒胸臆固不屑有一字一句奇人籬下也詞如蝶戀花云一樹
 海棠花婀娜半夜狂風處處飄花朵鶯老客歸無一可綠陰庭院門深鎖

難道東皇看得過未到污泥還望天憐我簾底傷春人獨坐自嗟心事都成
錯又云五歲分離殊太苦斷雁茫茫魂魄知何處山黛水藍明月素經過一
帶傷心路 準擬西湖尋樂趣今日西湖又帶愁心去如此天涯風與露有
人淚落還如雨滅蘭云雄奇浩渺如此青樓天下少曳起樓窗一面青山一
面江 風流才調贏得美人呼阿寶淡月初涼薄醉些兒自不妨又云天涯
佳境箇箇村莊皆畫景疑是仙家沒數紅桃沒數花 一般情韻山要遠看
花要近春水無涯更愛波紋似碧紗清平樂云天涯半載省試春憔悴悟後
心情原自在太息韶華易改 眼前事事淹留幾回提筆還休驀地低徊花
下可憐今夕中秋少年游云多時不寐太淒清欹枕數寒更酒已銷時茶餘
爽後爭奈此時情 如煙小夢來還去總是不曾成一箇吟蛩半牖清月相
約到天明菩薩蠻云尊前一箇人如玉幾番到眼看難足端的是嫦娥夜來
光豔多 花姿迷蝶性方寸渾難定忘記出門時有人雙淚垂臨江仙云天

氣有風無雨高穹一碧如指壓檐榆葉影蹉跎乍過初二二便有月光來
似夢如醒時候清音入耳潑洄誰將橫竹夜深吹卻疑深樹外別有好樓臺
皆性靈語雅與元人爲近

江都史繩之都護念祖爲藩司時以目不識丁被劾去官發憤著書哀然遂
成巨集其弢園詞亦規撫南宋第讀之使人氣塞錄其較可誦者一落索云
歲歲長堤古渡鴉啼蟬訴永豐坊裏記前生有斜照供遲暮 又受幾番風
露舞腰低處近來深淺換時妝未必被蛾眉妬秋蕊香云睡鞦韆雲鬢不攏愁
壓一肩衣重苦將紅豆沿階種種出相思無用 長宵心事如潮湧春衾擁
起來幾次墮釵鳳如病如醒如夢謁金門云人影外詩思被鶯啼壞風聚殘
紅斜日晒綠肥花徑隘 煙老柳輪畫黛風急蝶荒舞態也算春光填夙債
杏花和雨賣月中行云愁絲似篆出金鑪煙重倩花扶纖塵鑿鏡肯模糊瞞
過妾容孤 斜陽慣刺愁人眼休攜手再上春湖楊花未腐綠萍鋪君信斷

陽無一枝春云春別江南萬花飛釀出一天酸雨東風暫住願聽碧鷓餘訴
玉關萬里借一片殢雲偷度耐心數繭裏光陰偏不化蝶飛去 愁煞綠陰
千樹奈韶光不學塵心黏絮紅闌望眼例隔斷橋春霧桃枝水影是千古豔
陽歸路纔省得芳草天涯恨根種處甘州云一春來無淚可輕彈將愁餞風
花問移巢燕子隔年心事還集誰家偏是簷牙簾角容易夕陽斜但識春歸
路願送天涯 纔掃閑清如霧恨流鶯癡語雙鬢催華便遮留桃浪蘆蕪已
生芽任賣得鈴聲旛影滿殘紅羯鼓向誰擲休辭苦把銷魂酒換點春茶謁
金門云簾乍捲幾度薄寒輕煖一樣桃花開早晚雨風春不管 池水爲誰
碧淺梅豆向人綠顛昨日眠蠶今日繭欲言雙淚泣

小三吾亭詞話卷三畢

吾邑李巽庵廣文釋有句云自忖吾材是散樗蕭蕭風雪閉門居撐天立地
長貧骨三十年來一草廬黃昶軒振旭有句云席帽棕屨一秀才呂仙閣上
費疑猜我年三十貧猶昔不向邯鄲道上來胡一皂純有句云三十年華髮
早凋楚天風雨夜瀟瀟明朝有甚關心事詩滿奚囊酒滿瓢三詩均於三十
歲作趣味相似同年冒鶴亭廣生則云世間怪事無不有冒生三十尙奔走
自許特高不似三人之平曠矣

鶴亭詩豪爽英邁有御虛直行驅風挈雲氣槩贈潘蘭史云十萬金錢買寶
刀潘郎意氣海山高張先才調誇三影庾信華年感二毛未仕此身猶屬我
當歌何地不離騷茫茫多少新亭淚皂帽相逢愧爾豪贈陸郎云春去尋花
強自寬年來花似霧中看情人紫玉煙難化大道朱樓夜正闌樂府淒涼丁
督護河流嗚咽孔都官平生天寶開元淚每對龜年不忍乾贈陳士可云祕
史成吉罕奇觚石敢當此才猶抑塞天意太蒼茫隨分刀鋸掩何曾弩末強

不須怨遙夜長短有人量汝去真懷楚吾衰不夢周百年能幾見四海尙橫
流損益知何極艱虞淚暫收毋將寥落意進入仲宣樓皆卓卓可存之作卷
中贈方佩蘭同年參 璧一首並叙家世兩朝舊事言之縷縷以佩蘭爲桐城
方密之九世族孫故也詩長不備錄

佩蘭弱冠試童子時與余爲文字交家赤貧寡母教之讀賃居皖城孝子坊
側每漏盡三鼓仍聞其書聲作詩甚有逸致不自存稿戊戌成進士以中翰
改外作令餘杭頗有政聲戊申夏聞其病歿一官清冷孤孀幼子身後猶有
餘累致可歎也記其斷句云雪夜添衣慈母綫春風問酒故園花待到團圓
秋一片嫦娥宮殿太高寒楊花消息遲三月萍葉生涯又一年皆清婉有致
嫦娥二句竟成身後之讖抑亦奇矣

金勺園殺 熙舉二句詢余家貧瓦甃塵三斗歲晚綈袍值百千客長安者孰
可以當之余曰沈太侔其庶幾乎勺園笑曰是乃太侔近作也

或問詩必如何始當一瘦字余舉近人寒山石齒齒古月照潭水雪痕添白
髮霜骨露青山等句應之或云是猶有瘦字之意在其中太侔句云江山如
此我爲客風雨忽然秋滿城此二語乃瘦之真相

善狀山中景致語語在人意中者江密庵西山云路入西山好春寒散曉霏
水聲蒼玉佩雲態白羅衣巖峭花垂發潭空鳥倒飛不知身是客貪賞每忘
歸黃昶軒雨中揉擲樹煙外鴈迎人杉林沉日晚煙綠湖氣上山秋雨黃王
荻洲云夕陽紅過山人影長十里皆摹寫逼真語密庵詩中多警句五言如
鹿猿交飲澗魚蛤暗乘潮瓦雀巢垂拱跳魚上古槎怒風腥虎穴靈雨響龍
潭折蘆吹牧笛挂石晒漁簑筆管來蜂穴書牀落燕泥道路時傳虎村人樂
膾蛇七言如翠壁難窮雲瀕洞黑潭無底水幽深雲林負郭浦風峭雪浪打
磯江月多秋聲澎湃江湍大夜氣蕭森竹閣虛江河日下勞孤掌天地能迴
望中興俱憂憂獨造力追古人亦有極綿麗者如雜憶云萍水只增恨風光

空爾情才人嫁斷養名士悅傾城臨去猶迴睽將離尙寄聲四年得消息一
夢欠分明身如紅豆樹無處不相思獨自看煙水偏難似往時螺屏微月色
鸞鏡好花枝不爲年年恨春帆出海遲又和剛父云春愁不可理千萬垂楊
絲麗景因依駐穠條逐暫移莒華憂晚歲芳菱泣枯池借得聽車駕飛光或
可追親世豈乏術自憐麋鹿姿行吟碧草晚且與青山期海水恨難畢男兒
事可爲瓊蕤苟捐棄何以織愁思頗近初唐人筆意

余有散直句云夢神憐命賤癡僕笑官閒今見孫師鄭前輩亦有句云奴貪
私謗主女弱慣呼爺京曹苦貧奴僕訕謗此境不堪設想師鄭又有愁多閒
話少量淺酒杯深二語亦徵閱歷有得

惟古于辭必已出語不驚人死不休欲語羞雷同韓杜語也文章須自出機
軸成一家風骨何能共人同生活祖瑩語也梁鴻滅火復炊不因人熱六師
談禪必于空慧境界別開一法門皆知有我在故耳今人談書法則曰摹某

碑帖談詩文則曰仿某大家拾人矢概自忘其醜此毛遂所謂公等碌碌因
人成事者也某詠鏡云此處本來無我相相看畢竟受人憐

便牽魂夢從今日再覩嬋娟是幾時李文正公昉詩也銀燭未銷窗透曙金

釵欲醉座添香韓文公詩也環珮一聲星欲墮淚痕雙落夢誰家海忠介公

瑞詩也胡文忠公林翼舊憶篇彭剛直公玉慶梅花詩皆有爲而作言情亦

何損于正人耶

湘妓有名艾卿者陳生贈聯語艾艾如君能幾艾卿卿非我復誰卿又贈詩
有采采日三歲盈盈月半規之句皆見慧思又村妓名豆腐腦於漢卿戲作
絕句云桃花曾此誤劉郎喫盡胡麻別恨長若準石家珠換例三升小豆有
人量好色登徒意太癡縱然朽腐亦神奇橫陳態度無人見定似沙瓶爛煮
時老蚌居然產異胎梅花香氣襲人來闌情欲賦誰能賦須借陳思七步才
語頗諧妙

沅陵張月樵廣文桂壩工詩余客湘時因林歸耘傳甲獲讀其詩皆馳騁閎麗之作逾七八年不復記憶僅錄其讀墨子云干戈蒙皮虎變鼠六國紛爭懸刀俎赤血爲河青燐山周岐故宮生禾黍縱橫曳裾大丈夫仁義之譚何拘迂天心仁愛不嗜殺特生非佛終非儒耳口眼鼻但幻器親疏貴賤同一塗薄葬保體王孫達殷人尙鬼無采掇清者升天濁降地龍龕空濛現菩薩鹿上大夫心黯然不知有神只知天天帝茫茫非無主卅字分明懸胸前七日一周膜拜虔珠宮碧瓦霏雲煙泰山朝日聞歌絃儒童奔走達摩眠老子牛首儵西迴繽紛紫氣何怪哉流沙萬丈蒼天霾迷人鬼草戰血栽堯癩舜黑空心哀白日高築黃金臺木鳶不飛兩翼折造化洩奇秋石裂風霆鞭笞山河走龍頭閭漠虎牙缺能攻能守譚兵家殺人無聲紛如麻仰關況有公徒戟蚨飛水衡鐵沉沙天乎天乎渺難問十二萬年雌霓暈滿目酸辛草木愁清淨佛頭偏著糞儒分爲八墨歧三木生朽蝨玉含壘百萬蒼生難自由

大夫有知亦點頭翻悔著書七十一旁行上下窮冥搜烏乎大帝鈞天醉不休玉女投壺湘娥謾世間得失如浮漚麒麟夜泣鳳皇囚尙何公論談春秋奇氣橫溢慨乎言之龐德公有心世道於斯可見矣

顧俠君嗣立選元詩刻於小秀野草堂草堂在京師上斜街之北閩中陳石

遺學部衍新賃寓齋袁珏生編修勵準云是卽草堂舊址石遺近有元詩紀

事之輯始信此屋與元詩殆有宿緣作詩紀事云三雅門前昔駐驂而今戒酒老瞿曇芳菲合署棗花寺犖确疑分積水潭竹垞舊聞賡日下草堂雕本共江南元詩大有因緣在留此編排地一龕樊雲門方伯增祥和之云門多長者駐珂驂門內佳花涌鉢曇舊本棗梨同秀野小園楊柳異江潭選詩斷爛嚼胎上繩井幽光闌所南風雅衰於嘉慶末笑他祭酒詡詩龕又云傾蓋逢君勝故知春明何意聚牙期悲懷早止辛樓酒選本新添癸集詩老作斜街花市長貧無背郭草堂資絳雲舒卷丹青上比似淵明此最宜所謂癸集

者謂石遺新有元詩癸集拾遺之本石遺侯官人

石遺集中恰有佳句灘行云一篙尊比將軍令孤纜危於續命絲遊葦灣云宿雨怒添千本葦新晴爛放四圍花寄鄭蘇龕云寂寞江山春尚睡酸寒城郭客如僧集金山寺云此間置我應三日獨樹於人長百年答張珍午云避人騎馬君真癩博塞亡羊我自知皆平易近人自然入妙或賞其兩面又千萬里別二人早十五年知松篁摩頂以放踵奔湊清流成激湍敲訖村樓依樹杪艤簾岸影壓孤舟等句侈以爲創是亦月影分明三李白水光蕩漾百東坡之類也

石遺之兄木庵大令書詩近白蘇無格格不解之語說偈云一笑門前似虎溪却從人境得幽棲可中明月生公法無價清風魏國題六十八年蠶績尾二千餘首麝遺臍不須昨日龍興寺今日還知是水泥覓詩云真氣淪亡事可知鞠躬盡瘁亦何爲每從拂意翻成笑暫與棲心又覓詩聽雨已拚連夜

奠回來好生傷感百萬紙錢虛供養負不轉香魂下降咳我想佩娘亡後一月有餘怎麼連夢兒也不曾作得一個嘎(淚介)好悽惶天那何苦把清宵做得恁長

(睡介)(淨內)張姑隨我來(持拂塵引貼青衣扮張佩珊上至中場坐地介)張姑聽者你與莊生尙有夢中一面之緣吾奉地藏王菩薩法旨特來送你入夢此間已是你自去會他少時再來接引(下)(貼坐地徐唱介)

(前腔)徬徨甚風兒吹得俏魂搖漾(看介)這是那里嘎呀好奇怪(徐起立介)我乍觀分明還恁悅這分明是陽世間的光景我怎生到此的(想介)啊呀是了我方纔恍惚聽說是菩薩見憐把我送回的難道我竟返魂了麼呀呀我好喜(生夢中哭叫介)阿呀我那佩娘哪(貼驚介)呀驚魂暫定聞呼重復飛揚那個喚我莫不是地府追魂旛赶上(生)佩娘(貼)怎這般聽熟的聲兒悽惋(生驟起連叫介)嘎佩娘佩娘在那里相見(各驚拭目握手哽咽介)阿呀我的佩娘想煞我也(貼)阿呀老爺嘎(相抱哭介)(生)漫霑裳且問你一向分離飄泊何方

(集賢賓)(題)低徊想起堪斷腸那一霎呵乍眼底茫茫把瘦小身軀輕撇漾一靈兒去的匆忙(生驚介)阿呀我明明記得你的病是不起的了喲如此說來難道你當真死了麼(貼)老爺且喜如今是活的了(生)嘎如今是活的了(持燈細觀介)佩娘(貼)老爺(生)你當真是活的(貼)當真是活的(生笑介)呀呀啐佩娘好端端的在此怎麼說是死的嘎豈有此理風清月朗又不是華胥幻相真虛謊現放着玉容無恙

佩娘趁此良宵我和你明湖泛舟去(貼)最好(行介)(生)恰好那邊有隻小舟船家有麼(丑搖船上)來哉(山歌)入骨的相思姐共子個郎活的死了死的又還陽活的死了不計子個數死的還陽只有杜麗娘嘎大爺娘娘阿是要遊湖里儂(生)正是(丑)如此請上船來(生扶貼上船介)看仔細船家你可將船搖至湖心待我們細細賞玩(丑)呀是哉大爺故一答是古厝亭個一答是匯泉寺才坍塌拉瓦哉(生)佩娘我和你明湖歡聚倏忽半年又是一番風景矣(貼)咳

(前腔)只見高臺長樹一半荒又掩映垂楊流不盡的秋波時一響把湖山咽得冰涼(雜扮饑民携子女邊場哭下)(生)船家那岸上的人是作甚麼的(丑)大爺這纔是鄉下人年景弗好沒得喫子把親生個男女賣拉城裏向來今夜頭交代明白明朝一早晨好轉去捨弗得子故此拉里哭嘎(生)說也可憐(貼)咳我也是過來人嘎十年一晌又重見流離情狀我的爹娘在那里(泣介)添悲愴怕不是溝渠早喪

(生)佩娘且免愁煩(丑搖船同下)(雜扮四客四妓上)(客)陰曹無餓鬼(妓)世上多苦人(一客)請了今日孟蘭盆會十分熱鬧俺們特地約了衆位美人同來遊玩此處到還清雅何不就将酒肴取來大家暢飲這麼一回(衆)有理(隨意坐地譚飲介)(一客)俺悶酒有些喫不慣那位姐姐唱個曲兒與俺賞鑑賞鑑(一妓)唱支一輪明月罷(一客)太熟了不好(一妓)夢多情如何(一客)也不好還要新鮮些(一妓)唱甚麼好哦有了前日有位南邊爺們唱了幾支青陽扇即景生情倒

新鮮有趣兒我們就唱了這個罷(衆)妙極了大家都喫一杯(一妓)獻醜了(青陽扇)七月十五鬼趕齋大師飽哉呀呀居士困哉楊枝露灑不到閻浮界大家頭抵庄子餓倒泉臺呀呀推倒蓮臺(又一妓唱)七月十五鬼看燈水底空明呀呀月裏光明夜臺不見些兒影到弗如照荒墳一點秋燐呀呀幾點秋燐(又一妓唱)七月十五鬼趁錢生也空拳呀呀死也空拳紙灰堆滿森羅殿一霎時罡風疾吹去如煙呀呀飛去如煙(生紗帽海青貼色衣暗上)(又一妓唱)七月十五鬼散場各自悽惶呀呀獨自悽惶金鷄一叫天明亮那曾見超度了故鬼還陽呀呀新鬼還陽(生貼相視點頭介)(內奏梵樂介)(衆)妙極我們收拾過了往前面看熱鬧去(譁下)(丑搖船生貼同行介)(合)

(黃鶯兒)攜手共翱翔(貼)歎煙花沒下場是幾生該下的糊塗帳老爺我想他們自甘墮落不肯回頭兀自隨著那班俗物追歡取笑煞是可憐(生)便是(貼)仔細想來我好僥倖也苦海荒涼孽海荒唐謝您個慈航忽地從天降(生)已

國學萃編價目表

零售每册	大洋二角	如付銅元照市計算
每月二册	大洋四角	同上

一至十三册每册售大洋二角不折不扣預定應自十四期往後定不得自第一期起又六月以後欲補購以前所出各期每册收大洋二角五分預付本年十四期至二十六期先將閱費付清仍可作九折計算外埠每册加郵費二分如與敝處直接可免郵費先費後閱空函不答代派處提二成酬勞凡向代派處購閱者不得再有九折八折之扣仍須照章每册納郵費貳分此項郵費為開銷匯寄閱費之用郵費不得再提二成代派諸君有未將閱費寄繳者一律停寄仍須追繳所欠閱費

本社發行所在北京香爐營頭條胡同東首路北吳宅總經理吳夢蘭君